



თბილისის საქალაქო სასამართლოს ადმინისტრაციულ საქმეთა კოლეგია
დ. აღმაშენებლის ხეივანი XII კმ. N6

საქმე 3/3924-11
27.07.2012 წელი

აიპ - ინფორმაციის თავისუფლების ინსტიტუტი
თბილისი მაჭავარიანის (არაგვის) ქ#4

გეგზავნებათ თბილისის საქალაქო სასამართლოს ადმინისტრაციული საქმეთა
კოლეგიის 17.07.2012 წლის განჩინება.

დანართი: „7 “ ფურცელი.

ირმა კვაჭაძე

თბილისის საქალაქო სასამართლოს
ადმინისტრაციულ საქმეთა კოლეგიის
მოსამართლის თანაშემწე



გ ა ნ ჩ ი ნ ე ბ ა

საქართველოს სახელით

17.07.2012 წ.

ქ. თბილისი

საქმის წარმოების შეწყვეტის შესახებ

თბილისის საქალაქო სასამართლოს ადმინისტრაციულ საქმეთა კოლეგია

მოსამართლე ნინო ონიანი
სხდომის მდივანი ნინო ნიკოლაიშვილი

მოსარჩელე ააიპ ინფორმაციის თავისუფლების განვითარების ინსტიტუტი
წარმომადგენელი: გიორგი კლდიაშვილი, კონსტანტინე ჯანჯღავა

მოპასუხე საქართველოს თავდაცვის სამინისტრო
წარმომადგენელი: სოფიო ცისკარიშვილი

დავის საგანი ქმედების განხორციელება საჯარო ინფორმაციის სახით,
მიყენებული არაქონებრივი ზიანის ანაზღაურება

აღწერილობითი ნაწილი:

1. სასარჩელო მოთხოვნა

1.1 ქმედების განხორციელება საჯარო ინფორმაციის სახით, მიყენებული არაქონებრივი ზიანის ანაზღაურება

2. მოპასუხის პოზიცია

2.1 მოპასუხე საქართველოს თავდაცვის სამინისტროს წარმომადგენელი შუამდგომლობს საქმის წარმოების შეწყვეტის თაობაზე, დავის საგნის არარსებობის გამო.

3. ფაქტობრივი გარემოებები

3.1 უდავო ფაქტობრივი გარემოებები

3.1.1 ააიპ - ინფორმაციის თავისუფლების განვითარების ინსტიტუტმა 2011 წლის 2 მაისის #20110517 წერილით მიმართა საქართველოს თავდაცვის სამინისტროს და მოითხოვა შემდეგი საჯარო ინფორმაციის გაცემა: განცხადების მიღების მომენტიდან თავის საქართველოს თავდაცვის სამინისტროს საჯარო სამსახურებრივი



უფლებამოსილების განმახორციელებელი თანამდებობის პირთა ჩამონათვალი, თანამდებობის პირთა ვინაობა /სახელი და გვარი/ და თანამდებობის სახელწოდება; საქართველოს თავდაცვის სამინისტროს მიერ 2011 წლის პირველ კვარტალში /სამი თვე/ განხორციელებული კულტურული და სარეკლამო ხასიათის ღონისძიებებთან ამომწურავი ჩამონათვალი /სია/; საქართველოს თავდაცვის სამინისტროს მიერ 2011 წლის პირველი კვარტალში /სამი თვე/ განხორციელებული სახელმწიფო შესყიდვებისა (გამოცხადებული ტენდერები, კონკურსები და სხვა სახის სახელმწიფო შესყიდვები) და განხორციელებული სახელმწიფო ქონების პრივატიზების (ელექტრონული/საჯარო აუქციონების, პირდაპირი მიყიდვის, სხვა გზით) ამომწურავი ჩამონათვალი (სია); საქართველოს თავდაცვის სამინისტროს მიერ 2011 წლის პირველ კვარტალში (სამი თვე) გამოცემული იმ ინდივიდუალურ ადმინისტრაციულ-სამართლებრივი აქტების ჩამონათვალი (რეკვიზიტებზე მითითებით), რომლებიც მოიცავენ საჯარო ინფორმაციის მოთხოვნის დაკმაყოფილებას ან მასზე უარის თქმის თაობაზე მიღებულ გადაწყვეტილებებს.

3.1.2 ააიპ - ინფორმაციის თავისუფლების განვითარების ინსტიტუტმა 2011 წლის 2 მაისის #20110518 წერილით მიმართა საქართველოს თავდაცვის სამინისტროს და მოითხოვა შემდეგი საჯარო ინფორმაციის გაცემა: საქართველოს თავდაცვის სამინისტროს ადმინისტრაციის (ცენტრალური აპარატის) თანამშრომელთა მიერ 2011 წლის პირველ კვარტალში (სამი თვე) განხორციელებულ სატელეფონო საუბრებზე (ზარები მობილურ ოპერატორებთან, საერთაშორისო და ლოკალური ზარები) გაწეული სატელეკომუნიკაციო ხარჯების შესახებ ინფორმაცია; საქართველოს თავდაცვის სამინისტროს სრული სისტემის (ყველა სტრუქტურული ერთეული, ტერიტორიული და სხვა სისტემაში შემავალი ორგანო თუ დანაყოფი) თანამშრომელთა მიერ 2011 წლის პირველ კვარტალში (სამი თვე) განხორციელებულ სატელეფონო საუბრებზე (ზარები მობილურ ოპერატორებთან, საერთაშორისო და ლოკალური ზარები) გაწეული სატელეკომუნიკაციო ხარჯების შესახებ ინფორმაცია); საქართველოს თავდაცვის სამინისტროს ადმინისტრაციის (ცენტრალური აპარატის) თანამდებობის პირთა (ან ადმინისტრაციის სხვა საჯარო მოსამსახურეთა) ოფიციალურ და სამუშაო, მათ შორის საერთაშორისო, ვიზიტებზე 2011 წლის პირველ კვარტალში (სამი თვე) გაწეული სამივლინებო ხარჯების შესახებ ინფორმაცია; საქართველოს თავდაცვის სამინისტროს ადმინისტრაციის (ცენტრალური აპარატის) ბალანსზე რიცხული ავტომანქანების პერსონალური გადანაწილება (მათ შორის ავტომანქანის მოდელი) თანამდებობის პირებზე ან ადმინისტრაციის სხვა საჯარო მოსამსახურეებზე; საქართველოს თავდაცვის სამინისტროს ადმინისტრაციის (ცენტრალური აპარატის) საწვავის მოხმარებაზე გაწეული ფაქტობრივი ხარჯი და ყოველთვიური ზღვრული ლიმიტი (მათ შორის საწვავის ტიპი) 2011 წლის პირველი კვარტალის (სამი თვე) განმავლობაში; საქართველოს თავდაცვის სამინისტროს ადმინისტრაციის (ცენტრალური აპარატის) მიერ ავტომანქანებით მომსახურებაზე (შეკეთება, ცვეთა) ბიუჯეტიდან დახარჯული თანხის ოდენობა 2011 წლის პირველი კვარტალის (სამი თვე) განმავლობაში;

3.1.3 ააიპ - ინფორმაციის თავისუფლების განვითარების ინსტიტუტმა 2011 წლის 2 მაისის #20110519 წერილით მიმართა საქართველოს თავდაცვის სამინისტროს და

მოითხოვა შემდეგი საჯარო ინფორმაციის გაცემა: განცხადების მიღების მომენტისათვის საქართველოს თავდაცვის სამინისტროს ბალანსზე არსებული უძრავი ქონების ჩამონათვალი და თითოეულის საბაზრო ღირებულება; საქართველოს თავდაცვის სამინისტროს მიერ 2011 წლის პირველ კვარტალში (სამი თვე) შესაბამისი სამართლებრივი აქტის საფუძველზე ან/და საკუთარი ინიციატივით განხორციელებული იმ პროექტებისა და პროგრამების (სოციალური, მიზნობრივი, კვლევითი, სამეცნიერო, საგანმანათლებლო, ამა თუ იმ სფეროს განვითარებაზე მიმართული და მისთ.) ამომწურავი ჩამონათვალი, რომელთა დამკვეთს, შემსრულებელს ან რეალიზაციაში რაიმე სახით მონაწილე მხარეს წარმოადგენს საქართველოს თავდაცვის სამინისტრო; საქართველოს პრეზიდენტის და საქართველოს მთავრობის სარეზერვო ფონდებიდან 2011 წლის პირველ კვარტალში (სამი თვე) საქართველოს თავდაცვის სამინისტროსთვის გამოყოფილი თანხების ოდენობის შესახებ ინფორმაცია; საქართველოს თავდაცვის სამინისტროს მიერ 2011 წლის პირველ კვარტალში (სამი თვე) განხორციელებული სახელმწიფო ბიუჯეტი ასიგნებების ხარჯვის შესახებ ინფორმაცია (სახელმწიფო ბიუჯეტის შესრულების ბალანსი);

3.1.4 ააიპ - ინფორმაციის თავისუფლების განვითარების ინსტიტუტმა 2011 წლის 2 მაისის #20110520 წერილით მიმართა საქართველოს თავდაცვის სამინისტროს და მოითხოვა შემდეგი საჯარო ინფორმაციის გაცემა: საქართველოს თავდაცვის სამინისტროს ადმინისტრაციის (ცენტრალური აპარატის) თანამშრომლებზე 2011 წლის პირველ კვარტალში (სამი თვე) გაცემული ხელფასების და დანამატების (ასეთის არსებობის შემთხვევაში) საერთო კვარტალური ოდენობების შესახებ ინფორმაცია (კონკრეტულ პირთა ვინაობაზე მითითების გარეშე); საქართველოს თავდაცვის სამინისტროს სრული სისტემის (ყველა სტრუქტურული ერთეული, ტერიტორიული და სხვა სისტემაში შემავალი ორგანო თუ დანაყოფი) თანამშრომლებზე 2011 წლის პირველ კვარტალში გაცემული ხელფასების და დანამატების (ასეთის არსებობის შემთხვევაში) საერთო კვარტალური ოდენობების შესახებ ინფორმაცია (კონკრეტულ პირთა ვინაობაზე მითითების გარეშე); საქართველოს თავდაცვის სამინისტროს (ცენტრალური აპარატის) თანამშრომლებზე 2011 წლის პირველ კვარტალში დარიცხული პრემიების საერთო კვარტალური ოდენობების შესახებ ინფორმაცია (კონკრეტულ პირთა ვინაობაზე მითითების გარეშე); საქართველოს თავდაცვის სამინისტროს სრული სისტემის თანამშრომლებზე 2011 წლის პირველ კვარტალში დარიცხული პრემიების საერთო კვარტალური ოდენობების შესახებ ინფორმაცია (კონკრეტულ პირთა ვინაობაზე მითითების გარეშე);

3.1.5 ააიპ - ინფორმაციის თავისუფლების განვითარების ინსტიტუტმა 2011 წლის 8 ივნისს ადმინისტრაციული საჩივრით მიმართა საქართველოს თავდაცვის მინისტრს და მოითხოვა საქართველოს თავდაცვის სამინისტროს ინფორმაციული - ადმინისტრაციული აქტის საჯარო ინფორმაციის გაცემაზე უარის თქმის შესახებ ბათილად ცნობა და ამავე საჯარო დაწესებულების მიერ ქმედების განხორციელების დავალება, საჯარო ინფორმაციის გაცემით, იმ კითხვებზე, რომელიც ააიპ-ინფორმაციის თავისუფლების განვითარების ინსტიტუტის მიერ საქართველოს თავდაცვის სამინისტროს გაეგზავნა 2011 წლის 2 მაისს; ააიპ -

ინფორმაციის თავისუფლების განვითარების ინსტიტუტისთვის მიყენებული არაქონებრივი ზიანის 1 ლარის ოდენობით ანაზღაურება სზაკ-ის 47-ე მუხლის პირველი ნაწილის „ა“ და „დ“ ქვეპუნქტების მიხედვით.

3. 2. დადგენილი სადავო ფაქტობრივი გარემოებები

3.2.1 ააიპ - ინფორმაციის თავისუფლების განვითარების ინსტიტუტის 2011 წლის 2 მაისს გაგზავნილი წერილების პასუხად, საქართველოს თავდაცვის სამინისტროს 2012 წლის 15 მაისის #8/557 წერილი, რომლითაც ააიპ - ინფორმაციის თავისუფლების განვითარების ინსტიტუტს გაეგზავნა შემდეგი სახის ინფორმაცია:

1. საქართველო თავდაცვის სამინისტროს შესაბამისი თანამდებობის პირების ჩამონათვალი შესაბამისი მონაცემების მითითებით მოცემულია სამინისტროს შემდეგ მისამართზე. www.mod.gov.ge

2. საქართველოს თავდაცვის სამინისტროს მიერ განხორციელებული სახელმწიფო შესყიდვების შესახებ ინფორმაცია შეგიძლიათ მოიძიოთ შემდეგ საიტზე www.spa.ge

3. საქართველოს თავდაცვის სამინისტრო უფლებამოსილია განხორციელოს მოძრავი ქონების პრივატიზება. ამ სახის ქონების პრივატიზება საქართველოს თავდაცვის სამინისტროს მიერ 2011 წლის პირველ კვარტალში არ განხორციელებულა.

4. საქართველოს ზოგადი ადმინისტრაციული კოდექსის მე-2 მუხლის პირველი ნაწილის „მ“ ქვეპუნქტის შესაბამისად, საჯარო ინფორმაცია არის „ოფიციალური დოკუმენტი(მათ შორის, ნახაზი, მაკეტი, გეგმა, სქემა, ფოტოსურათი, ელექტრონული ინფორმაცია, ვიდეო და აუდიოჩანაწერები) ანუ საჯარო დაწესებულებაში დაცული, აგრეთვე საჯარო დაწესებულების ან მოსამსახურის მიერ სამსახურებრივ საქმიანობასთან დაკავშირებით მიღებული, დამუშავებული, შექმნილი ან გაგზავნილი ინფორმაცია“. აღნიშნული ქვეპუნქტის შესაბამისად, საქართველოს თავდაცვის სამინისტრო არ არის ვალდებული დაიანგარიშოს, გაანალიზოს და დაამუშავოს მონაცემები, თქვენი მოთხოვნების შესაბამისად (მათ შორის ჩატარებულ ღონისძიებებზე და ცენტრალური აპარატის მიხედვით გაწეულ ხარჯებზე).

5. სახელმწიფო საიდუმლოებას მიკუთვნებული ცნობები მოცემულია „სახელმწიფო საიდუმლოების შესახებ“ საქართველოს კანონის ამოქმედებასთან დაკავშირებული ნორმატიული აქტების დამტკიცების თაობაზე“ საქართველოს პრეზიდენტის 1997 წლის 21 იანვრის #42 ბრძანებულებაში. ამ ბრძანებულებით დამტკიცებული „სახელმწიფო საიდუმლოებას მიკუთვნებულ ცნობათა ნუსხის“ შესაბამისად, სახელმწიფო საიდუმლოებაა:

ა) 2.1.6 ქვეპუნქტი - კრებსითი მონაცემები სამხედრო ნაწილების, ხომალდების, ქვედანაყოფების, სამხედრო დაწესებულებების, შტაბების, სამხედრო აეროდრომებისა და დასაფრენი მოედნების, პოლიგონების, ბაზების, ნაწილების, სამშენებლო მოედნებისა და სხვა სამხედრო ობიექტების დისლოკაციის შესახებ; აგრეთვე მონაცემები დროებითი დისლოკაციის ადგილების მოწყობასთან დაკავშირებული ხარჯების შესახებ.

ბ) 2.3.4. ქვეპუნქტი - ცნობები სამხედრო აეროდრომებისა და დასაფრენი მოედნების, სამხედრო ქალაქების, ყაზარმების და სხვა ობიექტების (მათ შორის საქართველოს თავდაცვის სამინისტროს სასწავლო დაწესებულებების)

მშენებლობისა და სამხედრო მიზნებისათვის სამოქალაქო ობიექტების გამოყენების შესახებ; აგრეთვე მონაცემები აღნიშნულ ობიექტებთან დაკავშირებული ხარჯთაღრიცხვის, საპროექტო და სამშენებლო-სარემონტო სამუშაოების შესახებ.

გ) 2.3.12. ქვეპუნქტი - ცნობები ჯარების ორგანიზაციის, საბრძოლო და პირადი შემადგენლობის რიცხოვნობის (გარდა პირადი შემადგენლობის რიცხოვნობის კანონით დამტკიცებული ზღვრული ოდენობისა), იარაღის, სამხედრო ტექნიკის, ტრანსპორტისა და მატერიალურ-ტექნიკური უზრუნველყოფის საშუალებათა ოდენობის, ჯარების დაკომპლექტების უზრუნველყოფისა და დაკომპლექტების წესის შესახებ.

დამატებით, წერილის თანახმად, წარმოდგენილი შესაბამისი მოთხოვნები ეწინააღმდეგება მითითებულ ნორმებს, ხოლო გარკვეულ შემთხვევებში ფაქტობრივი ხარჯების გაანალიზების შემთხვევაში შესაძლებელია გამოითვალოს საიდუმლო ცნობებს მიკუთვნებული ზოგიერთი პარამეტრის დაახლოებითი მაჩვენებლები. ამდენად, შეუძლებლად იქნა მიჩნეული აღნიშნული მოთხოვნების დაკმაყოფილება.

მტკიცებულებები, რომელთაც დაეყრდნო სასამართლო ფაქტობრივ გარემოებათა დადგენისას:

პუქტი 3.1.1 ააიპ - ინფორმაციის თავისუფლების განვითარების ინსტიტუტის 2011 წლის 2 მაისის #20110517 წერილი - ს.ფ 27-28;

პუქტი 3.1.2 ააიპ - ინფორმაციის თავისუფლების განვითარების ინსტიტუტის 2011 წლის 2 მაისის #20110518 წერილი - ს.ფ 29-30;

პუქტი 3.1.3 ააიპ - ინფორმაციის თავისუფლების განვითარების ინსტიტუტის 2011 წლის 2 მაისის #20110519 წერილი - ს.ფ 31-32;

პუქტი 3.1.4 ააიპ - ინფორმაციის თავისუფლების განვითარების ინსტიტუტის 2011 წლის 2 მაისის #20110520 წერილი - ს.ფ 33-34;

პუქტი 3.1.5 ააიპ - ინფორმაციის თავისუფლების განვითარების ინსტიტუტის 2011 წლის 8 ივნისის ადმინისტრაციული საჩივარი - ს.ფ 14-23

პუნქტი 3.2.1 ააიპ - ინფორმაციის თავისუფლების განვითარების ინსტიტუტის 2011 წლის 2 მაისის გაგზვნილი წერილების პასუხად, საქართველოს თავდაცვის სამინისტროს 2012 წლის 15 მაისის #8/557 წერილი - ს.ფ 117-118.


სამოტივაციო ნაწილი.

4. შემაჯამებელი სასამართლო დასკვნა

სხდომაზე გამოცხადებული მხარეების მოსმენის, სარჩელისა და საქმის მასალების ანალიზით სასამართლოს მიაჩნია, რომ სარჩელზე უნდა შეწყდეს ჩარბობა.

5. კანონები, რომლებითაც სასამართლომ იხელმძღვანელა

- საქართველოს ზოგადი ადმინისტრაციული კოდექსი;



- ადმინისტრაციული საპროცესო კოდექსი;
- სამოქალაქო საპროცესო კოდექსი;

6. სამართლებრივი შეფასება

6.1 საქართველოს ადმინისტრაციული საპროცესო კოდექსის 24-ე მუხლის 1-ლი ნაწილით სარჩელი შეიძლება აღიძრას ისეთი მოქმედების განხორციელების მოთხოვნით, რომელიც არ გულისხმობს ინდივიდუალური ადმინისტრაციულ სამართლებრივი აქტის გამოცემას.

6.2. ამავე კოდექსის 331-ე მუხლის შესაბამისად თუ ადმინისტრაციული ორგანოს უარი რაიმე მოქმედების განხორციელებაზე უკანონოა და ის პირდაპირ და უშუალო (ინდივიდუალურ) ზიანს აყენებს მოსარჩელის კანონიერ უფლებას ან ინტერესს, სასამართლო ამ კოდექსის 24-ე მუხლში აღნიშნულ სარჩელთან დაკავშირებით გამოიტანს გადაწყვეტილებას, რომლითაც ადმინისტრაციულ ორგანოს ავალებს, განახორციელოს ეს მოქმედება.

6.3 სასამართლო აღნიშნავს, რომ ქმედების განხორციელების თაობაზე აღძრული სარჩელის დაკმაყოფილების კანონისმიერი პირობა კუმულატიურია: 1. უარი ქმედების განხორციელებაზე უნდა იყოს კანონსაწინააღმდეგო; 2. ის პირდაპირ და უშუალო (ინდივიდუალურ) ზიანს უნდა აყენებდეს მოსარჩელის კანონიერ უფლებას ან ინტერესს. ერთ-ერთი ამ ელემენტის არარსებობისას სარჩელის დაკმაყოფილება გამოირიცხება.

6.4 საქართველოს ზოგადი ადმინისტრაციული კოდექსის მე-2 მუხლის 1-ლი ნაწილის „მ“ ქვეპუნქტით განსაზღვრულია, რომ საჯარო ინფორმაცია არის ოფიციალური დოკუმენტი (მათ შორის, ნახაზი, მაკეტი, გეგმა, სქემა, ფოტოსურათი, ელექტრონული ინფორმაცია, ვიდეო და აუდიოჩანაწერები) ანუ საჯარო დაწესებულებაში დაცული, აგრეთვე საჯარო დაწესებულების ან მოსამსახურის მიერ სამსახურებრივ საქმიანობასთან დაკავშირებით მიღებული, დამუშავებული, შექმნილი ან გაგზავნილი ინფორმაცია.

6.5 მოსარჩელის კომპეტენციაშია, თავად შეარჩიოს იმ ფორმის სარჩელი, რომელიც მას ესაჭიროება მიზნის განსახორციელებლად, ასევე უნდა განსაზღვროს დავის საგანი, სარჩელის შინაარსი და მოცულობა, სასამართლო შეზღუდულია მოცემული სარჩელით და საქმეს იხილავს ამ სარჩელის ფარგლებში.

6.6 საქართველოს ადმინისტრაციული საპროცესო კოდექსის 272-ე მუხლის მე-2 ნაწილის თანახმად, თუ ამ კოდექსით სხვა რამ არ არის დადგენილი, ადმინისტრაციულ სამართალწარმოებაში გამოიყენება საქართველოს სამოქალაქო საპროცესო კოდექსის დებულებანი.

6.7 საქართველოს სამოქალაქო საპროცესო კოდექსის 272-ე მუხლის „ა“ პუნქტის თანახმად სასამართლო მხარეთა განცხადებით ან თავისი ინიციატივით, შეწყვეტს საქმის წარმოებას თუ არ არსებობს დავის საგანი.

6.8 მოაქიმოლო შიმთხვირაში. თბილისის საქალაქო სასამართლოში. 2012 წლის 16

მაისს დანიშნულ სასამართლო სხდომაზე მოპასუხე მხარის - საქართველოს თავდაცვის სამინისტროს მიერ წარმოდგენილი იქნა საქართველოს თავდაცვის სამინისტროს 2012 წლის 15 მაისის #8/557 წერილი, რომელიც წარმოადგენს ააიპ - ინფორმაციის თავისუფლების განვითარების ინსტიტუტის მიერ 2011 წლის 2 მაისის #20110517, #20110518, #20110519, #20110520 წერილებით მოთხოვნილ საჯარო ინფორმაციაზე პასუხს.

6.9 სასამართლო აღნიშნავს, რომ მოსარჩელის სასარჩელო განცხადებას წარმოადგენს, ქმედების განხორციელების დავალება - საჯარო ინფორმაციის გაცემა. ხოლო, #8/557 წერილის კანონიერება, რითაც პასუხი გაცემა ააიპ-ინფორმაციის თავისუფლების განვითარების ინსტიტუტს მოთხოვნილ საჯარო ინფორმაციაზე, მოსარჩელე მხარეს სადავოდ არ გაუხდია.

სასამართლო მიიჩნევს, რომ მოსარჩელის მიზანი საჯარო ინფორმაციის სახით აღნიშნული დოკუმენტაციის მიღებისა მიღწეულია და შესაბამისად სასარჩელო მოთხოვნის ამ ნაწილში უნდა შეწყდეს საქმის წარმოება დავის საგნის არ არსებობის გამო.

6.10 საქართველოს სამოქალაქო საპროცესო კოდექსის 272-ე მუხლის „ა“ პუნქტის თანახმად სასამართლო მხარეთა განცხადებით ან თავისი ინიციატივით, შეწყვეტს საქმის წარმოებას თუ არ არსებობს დავის საგანი.

ს ა რ ე ზ ო ლ უ ც ი ო ნ ა წ ი ლ ი:

სასამართლომ იხელმძღვანელა ადმინისტრაციული საპროცესო კოდექსის პირველი მუხლის მეორე ნაწილით, სამოქალაქო საპროცესო კოდექსის 215-ე, 272-ე მუხლის „ა“ პუნქტის, 273-ე, 274-ე, 284-285-ე, 414-416-ე, მუხლების საფუძველზე და

დაადგინა:

1. მოპასუხე მხარის შუამდგომლობა დაკმაყოფილდეს ნაწილობრივ, შეწყდეს საქმის წარმოება საჯარო ინფორმაციის გაცემის ნაწილში, დავის საგნის არარსებობის გამო.
2. განემარტოს მხარეს, რომ სასამართლოსათვის განმეორებით მიმართვა დავაზე იმავეს მხარეებს შორის, იმავე საგანზე და იმავე საფუძველით დაუშვებელია;
3. განჩინება შეიძლება გასაჩივრდეს კერძო საჩივრით, თბილისის სააპელაციო სასამართლოს ადმინისტრაციულ საქმეთა პალატაში (მდებარე: თბილისი, გრ. რობაქიძის გამზ. #7ა) მხარისათვის განჩინების გადაცემის მომენტიდან 12 დღის ვადაში, თბილისის საქალაქო სასამართლოს ადმინისტრაციულ საქმეთა კოლეგიის (მდებარე: თბილისი, დ. აღმაშენებლის ხეივანი მე-12 კმ. #6) მეშვეობით.

მოსამართლე

ნინო ონიანი

